

Hab. in Armeniâ prope Tortum (Huet!).

Planta 10-12-pollicaris collo dense fibroso insignis, folia radicalia 2-2½ lineas lata sæpe 6-10-pollicaria, achenia 9 lineas longa. Species certe perennis, caulium vetustorum bases enim persistunt.

21. **T. Pichleri**, glabriusculum, caulibus e rhizomate pluricipiti tenui ascendentibus simplicibus tenuibus parte inferiori foliosis, foliis infimis linearibus brevibus, cæteris a basi dilatata oblonga trinerviâ lineari-acuminatis, pedunculo longo nudo fructifero subincrassato, capitulo mediocri, involucri phyllis 8 lanceolatis acuminatis flosculos luteos angustos quartâ parte superantibus, acheniis marginalibus angulatis seriatim albo-muricatis in rostrum eis subduplo longius abeuntibus ♀.

Hab. in montibus supra Moudania Bithyniæ (Pichler!).

Fere pedale, capitula florifera pollicem, fructifera cum pappo 2 pollices longa. Radicis pluricipitis ut videtur perennis indole, pedunculis et acheniis minus incrassatis a formâ stenophyllâ *T. majoris* alienum, a *T. Olympico* et *pusillo* capitulo majori, phyllis flosculos angustos superantibus diversum.

22. **T. pusillum** (M.B. Taur. Cauc. Suppl. p. 521) subfloccosum tandem detersile, radice verticali in tuber oblongum inflatâ, caule pumilo simplici vel basi 1-2 ramis monocephalis aucto, foliis radicalibus anguste linearibus canaliculatis 5-7-nerviis interdum undulatis et circinnatis, caulinis a basi valde dilatata oblonga amplexicauli plus minus abrupte attenuatis summis capitulum æquantibus vel sublongioribus, involucri octophyllo ligulis flavidis subtus in sicco leucophæo-rubellis subbreuiore, acheniis striatis brevibus in rostrum crassiusculum eis dimidio brevius attenuatis marginalibus ad costas squamulis albis muricatis ♀. *T. tuberosum* C. Koch Linn. XXII, p. 662. — *T. pratense* β *eriophorum* D.C. Prodr.

Hab. in Georgiâ Caucasica in aridis ad fluv. Weru prope Tiflis (Rupr!), prope Baku (C.A.M! Seidl!), in desertis Elisabethpol (Hoh!), Caucaso centrali inter Kasbek et Darial 6000' et orientali in Daghestaniæ alpibus (Rupr!), Grusiâ (C. Koch!), ditone Talysch (Hohen!), Armeniâ Rossicâ et prov. Aderbidjan ad Khoi (Szov!). Specimina florifera ex Elija Armeniæ Turcicæ et monte Elamut Persiæ hor. (Auch. 4884) huc quoque spectare videntur.

Planta palmaris rarius semipedalis radice tuberoso-incrassata insignis, capitula pro plantæ magnitudine majuscula ea *T. graminifolii* superantia phyllis et flosculis elongatis. Specimina ex alpibus Daghestaniæ et montibus Persiæ et Armeniæ Turcicæ quæ florifera tantum vidi huc omnino spectare videntur. Incommodum est botanicos numerosos qui hanc speciem in Caucaso et Transcaucasiâ legerunt fructus veluti consulto neglexisse, cl. C. Koch excepto ex cujus speciminibus achenia descripsi.

23. **T. Olympicum** (Boiss. Diagn. Ser. I, 11, p. 46) glabriusculum radice longâ verticali tenui, collo vaginato, caule pumilo simplici folioso vel nudiusculo, foliis plurinerviis nervo medio albido validiori radicalibus planis linearibus expansis, caulinis brevibus a parte inferiori dilatata amplexicauli oblonga abrupte acuminatis sæpe